

No. 493. 1357. 21. Mai.

*Heynich von der Gane beurkundet Geldzinsen zu Schweimnitz an das Domcapitel verkauft zu haben.*

Ich Heynich genant von der Gane der junge bekenne öffenlichen an desym keginwertegin brife vnd tu kunt allen den di yn sehin adir hören lesyn, das ich recht vnd redelich vorkouft habe den eyrbern herren, dem tûmprobiste, dem techant vnd den tumherren zcu Misin sechs schillinge breytir groschin ewigis czynsis mit allem rechte vnd nützen, als sy myn vatir hat gehabt, di do legyn in dem dorfe czu Suymicz in dem gerichte zcu Misin, vnd habe yn di gegeben vmme virzendehalb schok groschin breytis geldis, der sy mich bereyt beczalt habin, vnd secze yn czu burgen Heynich, Nickil vnd Ticzeman brüdir genant von Kobirshayn vor eyne rechte lantwêhere des zelbin gutis von dem tage an zcu hebin, als sy komyn yn di lehin vnd gewere, als eyn recht ist yn dem lande, vnd das myn vatir her Henrich von der Gane rittir zal das zelbe güt bi iar vnd bi tage an wedir rede uf lasyn vor dem hochgeborn fürsten mime herren dem marcgrauen, der des zelbin gutis lehin herre ist, vnd zal sich des zelbin gutis vorczygin, vnd den kouf stete vnd gancz halten myt andern synen erbin. Wer is ouch, das myn herre der marcgrae der lehin herre das zelbe gut nicht wolde lihin, wem is die vorgebanten tumherren wolden lazen lihin, zo zal der vor genante myn vatir vnd ich, adir vnse erbin dor noch bi eyne monden den vorgebanten herren, an ufczuk das zelbe geld myt bereytschaft wedir beczalin zcu Misen an der stât, do sie mych beczalt habin. Ouch gelobe wir vorgebanten burgen, Heynich, Nickil vnd Ticzeman brudir mit gesamtir hant vor alle die vor geschrebin rede vnd gelubde, das di stete vnd gancz zullen gehalten werden in guten truen, an ark. Das allis das gancz vnd vnforrukt blibe, zo gebe ich vor genante Heynich selbschuldigir vnd wir ee genante burgen desyn keginwertegin offin brif czu eyne orkunde myt vnsyn ynsegiln geuestit vnd bestetigit, vnd wen wir Nickil vnd Ticzeman eygyn ynsegil nicht inhabin, zo vorbinde wir vns der vor geschrebin rede vndir vnsis brudirs Heynichts ynsegil stete vnd gancz czu halten an argelist. Der keginwertige brif ist gegeben noch Cristi geburt, do man czalte dreezenhundert iar vnd zebin vnd fumczik iar an dem nehisten suntage vor pfyngisten. Der vorgeschrebin rede geczuce synt di eyrbern herren her Herman von der Nuenstât, her Mertin von Turgow, her Niclaus von Dobelin, ewigin vicarien zcu Misen vnd di strengen Petir von Kobirshayn, Cornelius genant Sachse, vnd andir eyrber lûte genuk.

Nach dem Orig. im Stiftsarchiv zu Meissen. An einem Pergamentstreifen hängt das Siegel Heynichts von Kobirshayn; das gleichfalls an einem Pergamentstreifen befestigt gewesene Siegel Heynichts von der Gane ist verschwunden.